

沅  
湘  
耆  
舊  
集

沅湘耆舊集卷第一百三十二

新化鄧顯鶴湘臯編輯

湘陰左宗植仲基校訂

黃訓導崇實 二十九首

崇實字郁亭號篤庵安化人乾隆朝歲貢歿後選  
郴州訓導著有鳴鶴堂詩草明經爲惺溪太史德  
濂世父少能文屢躋場屋以經學教授里中詩亦  
樸老子少時偶見其一二今從惺溪所得其摘錄  
本存之

夜雨

夜雨何太驟乃入東臯東獨坐方寂悟不測其始終聞之

開窗望漠然失蒼穹恍惚擁雲堆混茫纏雷風忽忽潛潤  
物倏爾聲崇隆螢火闇點外簷溜幽感中悠然寺鐘動心  
與天地空

立秋後二日

立秋後二日晦尙隔六辰未月換金風適吾厄運殫吾生  
支屬雞干乃在甲先攝提貞孟陬春金其日元不分丁丙  
燬推諸日者云迴頭派已過渠果不我原瞻望卽蹇滯臨  
去猶纏綿五行皆生我試問有底寬添我西河淚廢我蓼  
莪篇亭用匪悟達人而不得痊天運秋更夏我運後易前  
早涼驅殘暑金行合相親挪揄亦已久餞汝短歌新行矣  
南荒去幸無再盤桓

缺齋居

吾室堂東隅，搥室甃中缺。踰時不容旋，但取自怡悅。蒙叟善齊物，胡云走海鼃。澗水訶行潦，島洋灑河決。小大固不殊，靈蠢亦何別。茲居破煩惱，還足逃冷熱。隨意治吾生，放懷對先哲。常作候蟲鳴，酒酣歌擊節。諸有環於斯，不謂斯名劣。達觀與斷章，讀古反饒舌。苦吟韻未終，纖雨雜霰雪。春寒親夜炕，方竇好密閉。

壽樂詩二十韻呈家梅嶼

明開孝廉有引

梅嶼翁工詩性豪放，善飲一日來。余家沈醉劇談數日始去，自言生平無此樂。今秋訪益陽某友，羈飲亦如此。是一歲得兩樂矣。昔東坡作百步洪詩，遺王定國以謂

李太白歿世間無此樂三百年矣今翁一歲而得兩豈  
直坡翁比哉乃爲詩以壽之名曰壽樂詩

眼中人何夢頭上天亦隘蠢福輸俗庸一物獨慳賣兼有  
數焉存併於我輩殺人言公善權那得公果快酌雪堆淋  
漓談濤涌澎湃胸剖肝膈出耳熱皮冠挂心醒呵酒狂手  
辣硬詩療言人不敢言勿顧衆驚怪此樂歲幾遭公言今  
兩屆言之可寶珍思之深感喟聲氣誰是真韶光日以邁  
經年兩遭樂天公肯償債此願果成例合向穹蒼拜誠恐  
禱祝微難叫上方曠會須極文詞聊以補破壞縱恣五字  
言追尋五宿話此時冀再來此興或不敗遇汝風塵表志  
汝沈寥界持用永醪醇詎同啖餅盡

奉酬家梅嶼翁剛定詩藁

自幼讀貽經一經未讀破

自注來詩云吾翁與若翁貽經心欲破

旁及聲韻

餘小窗記嚴課尋求幾卅年興到不會情師古還師心竊  
欲參末座敢求同輩諛深恐古人唾點石煩推敲除秕且  
揚簸得及公家居此遭我自賀

九龍池

仰睇無雲之義丸俯測重陰之邃淵石古溝細池已填靈  
根噴薄不可湮穴壤唾沙鼎沸難睡者蚘蟊是何年萬里  
直論咫尺閒竭來屢欲坐碗礪只恐神物嗔我起取眼桑  
田爲東海

北斗

沙洲耆老集 卷之三 二  
維北有斗象耀目不對我漿盛我穀吾鄉老農有古占柄  
指正西恰成熟腐儒枵腹有癡願毋乃柄移緩不逮去年  
騰賊劫我糧今年日月偏舒長十口之家憂青黃夜夜膽  
在朔尚作欹器形安得壯士扶持不須傾田中便有打稻  
聲

擬秋閨

懶倚珠簾立聊移苔徑行紅箋空數數白月自盈盈夜枕  
難留夢秋宵最宵明相教求旦鳥莫作五更聲

秋窗

秋窗偏厭坐秋夜意如何月滿星河失山空響籟多良宵  
爲誰設冷節把書過恍恍清光裏隨行踏綠莎

益陽舟中小泊口占

竟日雨廉纖初晴恰小淹  
迎人風力軟碎月小紋恬  
擊鉢詩纔就停杯酒再添  
行榔有如此何意問郵籤

讀杜

讀杜將春過披編每夜分  
悲歡流肺腑幻怪出風雲  
滄海衆流滙高雲元氣氤  
多情時中此誰爲解沈醺

益陽腐園偶成

奔走資陽路匆匆此暫停  
幾年苦傭鼠一夜賦原鴿  
到眼有生意開懷無委形  
林泉好相識不覺已旬經

寒食弔古冢

寒陰漠漠覆荒榛又值蕭條百五辰  
塋畔隔煙樵有語樹



頭飛雨鬼無憐棠梨那見題新句麥飯誰爲作主人憐汝  
生猶名利客青山白骨不堪詢

暮氣侵人半有無依稀古墓迹深蕪松門此日穴狐鼠石  
甃何時瘞髮膚在昔衣裳曾賴竺從茲釘鉸亦傳胡幾回  
封向蒼茫裏欲叩青楸與碧梧

鎮龍寺詩六首

有引

寺先指揮遺跡也丁丑重葺而小之諸像以漸妝飾卽  
其東間爲公祠環以田園爲伊蒲計無竹樹陰蔽外則  
壘石四周不盈三尺空闊可坐覽焉詩以誌之

神龍吟嘯想前龕窟宅傳聞滙碧潭

自注入十年前茅道人晦雲至此復修

滄海桑田莊女鎮旁風上雨道人庵

自注寺之西北舊爲巨潭相傳曾聞龍吟

昔堪繞佛稽蒙讀今可棲僧引衆參回首初聞清淨地

歎吾祖口碑諳

自注開係明初指  
揮編氓籍時所建

武功遠汴建麻陽靈主新成選佛場萬里風塵三尺劍千

家俎豆一閒堂龍關蹟杳如千載燕壁題杼定幾行

自注  
指揮

過桃源燕子崖題  
壁詩至今猶存

儘閱秋春此依戀忍忘濡露忽零霜

九乳由來此地偏古榕鑄迹可詢年

自注明萬歷  
年古榕山鑄

蒲牢吼

過先朝厯老衲鏗於上界天常是晨初聞欲覺詎無夜半  
到愁眠寄聲終日匆匆客莫向周行尙惘然

禪燈作記迹陳陳厯劫長留半石身蝕盡鴻文烏鳥下封

殘薤葉綠苔皴琉璃再擬光明藏蠟炬常熒沐浴辰惆悵

暮風吹拂處研朱搦管是何人

霜黛何時縱斧尋當年曾結喜園陰惟將不朽留根本別  
有無窮閱古今種樹攀條人杳杳衝煙破石幹森森自注今復

長丈餘皈依免作多情物可是菩提沒影林

依稀曲徑展行窩一片荒涼足嘯歌落葉風經孤磬下殘  
蔬春共老僧過班班絡婦開蛛網澹澹遊絲帖翠螺翻愛  
疎籬趺坐處窺人早覺月光多

矮桃

短短桃枝細雨中花開恰受養花風舊含荳蔻依濃綠新  
買胭脂襯淺紅款叩定教雙屐續因緣曾許一杯同苔岸  
薜塢低徊處猶得君來重染烘

簡敬修姪 德彰兄弟蜀中 自注姪寄籍蜀之三台縣

君家人物足英雄論事掀髯是楚風白帝舊招黃鳥去注自  
少時見其祖詩有黃鳥西飛去三台今在五雲中父經祖  
之句先君云卽以其年入蜀研傳無替季虎昆龍氣本同何日向南隨謝豹故園一識  
羽毛豐

寄理念師

自注時師坐卧東溪芙蓉山寺下之巖龕

巉巖漫說少人蹤絕跡飛行不杖筇黃葉自然遮敗衲青  
山豈必住芙蓉

忽然巖穴忽高柯絕粒遺緇亦脫鞵他日故人相訪處豹

關虎窟一頭陀

自注住處時藏虎豹

杯浮野渡隨流水巢借高枝倚夕陽不有鶴廳數居士此

閒無地著君狂

神仙界口占

自注山在安化桃源之間屹峙雲表

半生幾到神仙界不作神仙也是仙亦霽亦晴上清路爲雲爲雨下方天

半生幾到神仙界不作神仙不是仙我欲追隨紫雲杳

自注

山頂有舊寺遺址

荒館何日了塵緣

蚤餐醃芥湯主人以乏辭戲成二絕

鹽梅調鼎三公事醃芥登盤羈客餐慚愧犁和湯伴煮那知風味稱寒酸

種譏廿七三餐異孫喜繁多一飽同我敢學坡聊學庾莫愁彈鋏更歌馮

李山人仕進

二十七首

仕進字退思新化諸生自號梅里山人著有梅亭漫草山人狀貌英偉嗜酒善琴落拓自喜早歲山居嘗題其門曰千秋而後誰名世大塊之中此放懷吳蘭翁見而詫之因與訂交余髫齡時卽識山人輯其遺詩猶想見酒酣縱談鬚髯張時也

詠懷

博覽探羣籍氣數有微言乾坤闢其戶龍龜甫濬源消長在宇宙萬物太初元徃來成古今窮通難具論邈然千載下藉此清心魂風雨時閉戶杖策閒出門淡宕山水閒載酒謝公墩坐看浮雲意勿令青雲吞

問余棲碧山天放散人寬杜跡遯邱園天道暑復寒歲問

飈流逝野服仍黃冠青雲豈墜志白屋亦居安耕釣有王  
道樵夫嗤笑端由來梁父吟抱膝空長歎落落窮巷士搔  
首終泥蟠

大運際休美天人兩相參陰陽有剝復日月懸昊函天高  
而地卑生息皆哺含王道正蕩平萬物遊春酣竊見營營  
者歛起滋貪饒人紀斯不振大道豈無慙四極靡然耳浮  
僞紛交驂自我作淳古斯人幾負擔俯仰天地閒懣然多  
憂懷

涓子好道術乃著天地經琴心有微旨至論破元扁琴高  
學涓彭舍人道亦精涿水取龍子乘鯉去長生古之善琴  
者翩翩翔玉京投契在知己千古有同情我亦誦琴心大

雅欣元音戴逵不應召汾亭抱膝吟余懷旣渺渺同調難  
招尋子昂抱孤憤都門碎瑤琴

卞和苦泣玉屈子屢哀蘭若彼莊惠流藐若無所干古人  
各殊趣捫懷適我安還顧斐然子曷能窮其端畫龍不好  
真假鳳爭腐餐何啻秦越人同處別膽肝

志士甘溝壑勇士輕其元人生樹梗槩自可方岱岷世俗  
趨榮利得失殊所昏小人爲蟲沙君子亦鶴猿滔滔江河  
水安復存淳源

千歲名還在百年身已亡所爭在旦夕茲爾堪嗟傷萬物  
有榮謝日月不相假所歎失流光天公不相借

吾道一仙道養生乃淑身名堅與身堅仙人偕聖人皇古



沙洲春集卷之三  
混沌開元運值在春甫鍾太初撰偏含氣有神真精久不  
朽浩浩誰與隣迫世屢變易清濁溷迷津哲士研道術鍊  
骨還天真邈然處區寓姑射本絕塵精勤守不失汗漫遊  
無垠

我欲跨瓊鶴飄飄入蓬島島上一仙人相攜拾瑤草飲我  
綠玉髓示我玄牝道忽覺東風來青天碧如掃俄然寤歌  
聞邈若閑遠抱感此契洪厓遺景事幽討

後感遇

伏處巖阿士卓犖博羣書平生卜太易初九潛於儒名虛  
列膠序跡自耽泥塗學道子與氏浩氣養六虛緬懷在千  
古離羣而索居空山寄笑傲簡編可卷舒不知老將至何

事倣史記天放字仙聞尋君賦遂初

疇昔使豪氣較轢思無前常恐天下士較先著我鞭屢是  
試不舉捧檄情空懸竊矯青雲志不干榮祿牽書記博學  
車琴劍常蕭然此日黃金臺萬里爭趨燕驚馬不任效聊  
復棲林泉

驅車出門去隴阪亦何長崎嶇歷磴道宇內阻太行哲士  
不履險君子不越防延首風塵下萬物忌堅芳

天地何凋喪世俗日沉淪雲雨翻覆間朝暮疑越秦交道  
無常好何況張與陳嚶鳴乖幽谷醞酒空相親山河負誓  
約咫尺生埃塵卓哉嚴子陵滄波獨垂綸

古有玉京客不與紅塵羣上餐紫光霞凌虛乘碧雲揚言

海上來自稱安期君白玉童吹笙鸞鶴空中鳴我欲從之  
遊無由達我情暫食金光草鍊骨使身輕欲求不死方他  
日約蓬瀛

送秋

沈卻炎氛障還來天地清可憐青女老又判素娥行鶴掠  
孤舟夢騷吟落木情草亭秋盡日閒嘯送詩城

擣盡空閨月長安少婦樓胡兒爭牧馬漢使久防秋衣寄  
宮娃信書傳雁足郵人生悲短景拾葉一吟愁

明月人千里關山木葉稀驅車適異國寒夜整征衣騷客  
吟蕭景行人對落暉九秋頻易序翹首歎芳菲

望遠與懷古山川起四愁煙寒隋苑柳霜落漢陵秋孤館

月空暗高樓雲不流平蕪爲博興偏使意悠悠

地北羈離塞天南放置城騷懷無國控歲序使心驚畫角  
寒更靜空堂夜雨聲尋思秋已盡感慨撫平生

天地猶停旅流光疾轉丸仲秋剛祀社明日共迎寒五柳  
休吟菊左徒猶佩蘭元冥令已屆秋色劇闌珊

何處耽騷興傷秋又送秋六虛山此日千古共鍾愁漠北  
晴天少湖南芳草收風塵之子怨幾逐塞鴻遊

只此蕭條氣悲哉宋玉愁何當一樽酒更與其吟秋江漢  
風聞楚湖湘賦滿樓文章渾漫興千載共相酬

蔣玉潤一璉別墅

垂鞭來一訪三徑已黃昏碧柳徘徊影烏衣款衙門鑑人

推郭泰好客有陳遵秉燭重論酒猥辭倒玉樽

落榜後曉發長沙

曉別芙蓉國揚舫千里歸碧天湘半冷紅葉雁孤飛顧我  
猶存劒還山更下幃余懷秋水外旅棹共依依

屈賈祠

楚懷去國漢興年逐宦孤臣今古憐只道椒蘭偏惑主豈  
知絳灌共讒賢荒涼舊井尋秋草羃歷寒湘帶晚煙莫向  
遺編徵往事問天賦鵬並茫然

浮湘

百里江干半日程順風行駛片帆輕秋光初抹絲絲柳三  
十六灣無限情

一天門

自注在安化昔年曾  
隨先孝廉兄過此

束髮曾追杖履遊  
漫天風雪此停舟  
悽然更感中年淚  
黃葉蕭蕭一寺秋

李秀才馥

九首

馥字毓才號松齋  
新化廩生性慇  
直家貧刻苦自  
厲授徒養親三  
旬九食晏如也  
詩不多作曾從  
其子克柱處抄  
撮數首以存梗  
概

病中示兒

大弔必受檠大木  
待施斧質美教  
不先瓊瑤等硃  
砥況以豚犬姿  
妄冀光門戶有  
子萬事足此論  
吾不與嗟汝兄  
若弟顧名義可  
舉大兒性頗慧  
名愚且字魯高  
明豈不佳但

恐潮畫虎次取友于義手足期善處要知至性流先以孝  
爲主三兒素柔暗自立宜勤苦無爲捲地蓬要作擎天柱  
小者在懷抱撫之淚如雨余誨恐弗及願以母氏補我病  
日沈篤我言愈酸楚言可作鍼砭慎勿如聾瞽爾父不足  
效但願繩祖武

古硯并序

硯本土質似澄泥佳者廣四寸許厚一寸中微凹滴水  
其中歷久不涸背刻靈淵二字先大父得自辰州今歷  
三世矣

硯田宜石不宜土此硯扁爛質偏古匪端匪欵價匪高百  
錢購自辰溪潯背鐫二字點畫工姓名年代俱難窮天陰

日暗津梁出疑有黑蛟蟠其中邇來三世承先澤堅貞直  
欲伴金石幽香披拂無盈裾積墨淋漓光照席吁嗟先人  
課授老一編肅條家業惟此傳攜來池畔不忍洗百年手  
澤存靈淵

題益陽舊館壁

桑下曾三宿扁舟此又經  
纔臨秋水白眼對舊山青  
工賈鄉音雜魚鰕曉市腥  
重來無限感拌醉不宜醒

喜白沙先生自山海關歸見訪

卅年謫戍老窮邊  
皂帽驚看返故園  
履跡不忘尋蔣徑  
嘯聲依舊出蘇門  
遼西煙月歸詩卷  
冀北風霜上鬢痕  
差喜居鄰今宛在  
隔牆呼酒倒餘樽



過茱萸灘憶昔年同歐陽礪東孝廉沈舟於此感而有作

此閒曾破孝廉船依舊巖花映日鮮去日苦多來日少前人竟讓後人賢世情眼見雲爲狗客跡心驚水墮鳶歸計只應謀橡栗葦閒一棹漫緣延

偶步承熙寺

熙寧古刹有遺蹤零落亭台第幾重燈影照殘僧鬢短蒼浪添上佛頭濃豫章白晝號風雨廢院黃昏寂鼓鐘四十八庵何處問荒煙如許一扶筇

過輦溪

石磴欹斜繞薜蘿江村風景近如何薔花委地秋霜早楓

葉漫山夕照多霞彩似迎神鯉出波光曾送翠華過自注  
宋理宗爲邵州防禦使過此又十茫茫古意憑誰語斷碣  
人言潭下有赤鯉山則紅光燭天

苔紋手自摩

### 晚抵長沙

櫓鳴啞軋雁聲高兩岸疏林月上稍煙裏不知山寺近隔  
江先聽晚鐘敲

行李蕭蕭酒數巡榜人估客孰堪親惟餘嶽色青於眼長  
與荒僧作主人

### 鄧遜翁正笏二首

正笏宇庭一新化人既老復試於有司以正榮名  
附縣學籍非其志也先生天資純粹學宗宋儒往

者吾鄉儒碩新化有黃遇清安化有鄧宏宇一時  
倡爲理學然皆湛深經術不爲空疏迂腐之談先  
生皆與之交遇先君子如兄弟余少時往返安益  
閒道出蘇溪必過先生間起居流連日夕以諸父  
事之先生亦以猶子畜余喜爲詩嘗見其手書壁  
閒偶句云銜杯笑問門前客擁絮慚看膝下兒見  
兔開弓關手敏羨魚垂釣怕心癡此類甚多不愧  
爲有道之言先君之喪先生猶遠來哭弔次年亦  
卒余他出未及視含後往拜其墓哭之間其家遺  
稿不可得止誦其臨終四語其生平所養略可見  
矣先生隱居蘇溪自號遜溪某人曰以醫濟人

臨終示諸友詩

皎皎梧桐月悠悠楊柳風衡山湘水外梅影竹聲中

口占示兒騏兼簡從弟公一

芹惟水草爭先綠芍是山花殿後紅止有庭前兩株柏等閒吹不到東風

孫國子鏜

四首

鏜字有聲新化監生白沙詩老之子

次韻黃立之喜余北來省覲

海山翠嶽天下雄淒絕饗空萬里風羈人遠目送賓鴻少年才氣步江東甯思此地遠相從幼好奇服豈不衷嚙臚老我禿節翁骨肉三州五郡中珠淚九秋曉露叢此來趨

庭秋復冬瞻依色笑寫心胸無官卻如兩衙蜂高施絳紗  
閣鑄工前身涪翁秀氣鍾情逾父子蘭馥同嗟我何須盡  
五窮交呂攀嵇綠鬢蓬萬里晨昏絳蠟融

### 大佛寺

匹馬經過正定城幽深佛地曉涼生每懷彌勒同龕意自  
悟楞伽半卷情斜日浮圖盤鶻影緒風蕭寺聽猿聲只應  
欲證黃梅祖莫遣恩恩負此行

### 龔藏橋以重遊都門咏索和次韻二首

燕山雲樹幾回過短筇長轡喚奈何且對玉船尋痛飲便  
應銅斗拍高歌梅花解笑吟詩苦蝴蝶生香入夢多昨夜  
月明渾似鏡芙蓉芳訊問仙娥

六街塵散軟紅生  
旖旎晴窗特地明  
寄跡天涯緣底事  
論交海內盡知名  
北平射虎蕭蕭夜  
越石聞雞鬱鬱情  
他日風流輸我輩  
旗亭樂府好同聽

秦處士天鍵

二首

天鍵字曰聞號啟齋湘潭人少穎悟以目眚絕意  
進取遍遊吳越晚歸構香草閒房以吟詠終所著  
書甚富有香草閒房詩集四卷同縣張度西詩老  
九鉞贈句云才學識操千古筆風花月老一枝簫  
歿時自輓云芻酒漫勞徐孺子碑銘不藉蔡中郎  
其標致如此

陶公山懷古

沙洲卷之三  
湘山多平遠雄秀惟陶公旌節曾駐此山以畸人崇遙望  
發長慨歷歷懷前蹤典午逮中葉中外盜寇訐荆湘控雄  
鎮半壁護江東矢志清河朔努力翦羣雄義旂指石頭舳  
艫蔽江汎灑泣風雲黯笑談江海通一時劉與祖同志而  
異功分陰亦珍惜運甃勞匪躬竹頭與木屑纖微撿攝同  
功成懼盈滿天門夢入重菟裘老屋沙善始還令終勛名  
著晉室遺蹟畱湘中亭臺與洞壑不獨山穹窿登山一長  
嘯英風來遠空

黃葉亭

江閒何日泛離觴人去亭畱蹟未荒雲裏無書頭欲白風  
前有淚葉初黃涇鋪樵徑瀟瀟雨晴染楓林薄薄霜一白

韶州題詠後不傳聲處有餘香

梅秀才鼎 三首

鼎字愛吾武陵諸生有糞心園集

同人放舟續枉山舊遊夜歸

節近登高共放顛枉山買棹又經年重尋古塔迷秋草更  
踏荒陵咽冷泉紅樹蕭森寒露裏青山迴薄暮雲邊王孫  
佛子俱愁寂惟有當時月在天

初冬集飲理齋賦得紅樹呈研翁

顏垣缺處青山補坐愛君家倒酒尊點點歸鴉翻夕照蕭  
蕭落木近柴門寒山石徑白雲路漁火江楓烏夜邨野外  
幅巾攜杖好不妨小立到黃昏



將過星沙畱別諸友

星沙暫賃讀書堂半爲藏修半避忙不嫁已判成老女近  
時誰復炫新妝早知窮達皆由命底事文章盡擅場此去  
湘江春水綠東風猶及早梅香

馮秀才學醇

四首

學醇字香泉武陵人諸生有僅存草

客中紀遊

破浪宗生志未償茲遊何惜滯遐荒江山不管詩人老天  
地能容我輩狂野興偏宜黃葉寺此身擬託白雲鄉漁歌  
牧笛江邨晚半醉歸來趁夕陽

秋日東山亭射飲幕歸

遊屐偏宜秋氣清  
東亭射飲散閒情  
一尊又伴青山晚  
萬里徐看皓月生  
飛蓋樓臺餘暮靄  
歸鞍鐙火帶孤城  
將軍不減山公醉  
笑看兒童拍手迎

春宴

豔陽時節小樓東  
百榼淋漓醉晚風  
草色入簾袍借綠  
花光照席酒分紅  
感懷每憾千年速  
放眼何妨四海空  
更欲相期文字飲  
彩毫揮灑暮春中

謁杜工部祠

東屯西瀼總天涯  
客裏棲遲歲月賒  
千首詩成惟戀闕  
百年身在獨無家  
驚心花鳥孤亭迴  
滿眼風塵兩鬢華  
只有窮途憐後輩  
蒼茫雲水動咨嗟

劉處士瑤立

三首

瑤立字斗文安鄉人

峴山羊太傅祠石幢詩刻

東坡不謫黃黃應無雪堂羊公不鎮荆峴山亦尋常自從  
太傅來山頭日舉觴追念昔遊者湮沒爲感傷人生惟令  
聞山水得共長口碑載一時千載薦馨香祠石半詩刻慶  
歷光煌煌王洙首爲倡和者十五章人事已代謝宇蹟亦  
微茫我讀墮淚碑泣下爲數行

別杜生自倣

趁曉寒鴉無數號歸舟遙轉亂山西夢魂不畏重灘險昨  
夜隨君過九溪

李北海石室

咸城東畔桃花洞石室不知何代封彷彿書聲來遠寺月  
明僧打五更鐘

彭應慧二首

應慧字履無考巴陵人

和白竹寺禪宗上人山居原韻

塵淨緣風埽僧歸只大知空庭雲漠漠小閣日遲遲擇地  
君能隱消閒我亦宜自今居止悉來往不爲期

爲喜紅塵遠從知俗客稀二牛釋輓立雙鶴入秋肥卷幔  
收朝爽凭欄送夕暉天涼風欲起還掩小窗扉

方應和一首

應和巴陵人

君山遊覽歌

洞庭天下稱名勝十二青螺銀盤定浮生塵海日奔忙老大未遂登臨興有客招邀訪山靈盈盈一水盪空舸赤沙西連渾無際波濤澎湃喧雷霆東風飄飈疾如矢頃刻飛渡三十里雲煙縹渺樹扶疏瞥見蓬壺眼前時艤舟龍口踏莎行瘦僧如鶴來相迎丈室風翻松濤冷半甌香泛茶煙輕閒從山隈尋古蹟井畔石欄圍老橘精藍崇刹榜有緣福地曾傳第十一捫蘿才寸步崔嵬白雲幾疑拱高臺鑄鼎乘龍不可見殘碑黼蝕封莓苔日暮牆頭棲鳥亂欲枕無眠魂夢斷鐘聲梵唱振耳傍起視殘星天欲旦凌晨

挹露拜湘妃竹淚斑斑翠染衣蒼梧夢到望不到祇今遺  
躅生歎歎離情脈脈奈何許榜人催歸下山去雪泥鴻爪  
認何時回首蓬山如欲語

張言嘉 一首

言嘉字梓塘湘鄉人

登東臺山

此心不若暮雲閒萬感茫茫俯仰閒引手且捫星斗看大  
聲狂喚鳳皇還湘流東去應千里山勢南來作一關隔岸  
褚公祠廟在夕陽深樹翠煙環

顏大登 一首

大登字餽塘湘鄉人

丙午

步瀛子不金 卷之三十一  
漣濱卽日

漪漪湘浦極澄清  
渡口人來趁晚晴  
白水遠從花港滙  
藍田遙接澱溪平  
前灘舟飽歸帆影  
夾岸村喧打稻聲  
秋意滿天看不盡  
江亭危坐酒頻傾

黃齊旼 一首

齊旼字雲航湘鄉人

朱津渡

湘煙如黛水潺潺  
放棹中流任往還  
疏雨過江猶見日  
懶雲橫岫欲無山  
杏花村外青帘裊  
雁齒橋頭畫艇閑  
向晚漁歌何處起  
一痕明月照前灣

沅湘耆舊集卷第一百三十二終

沅湘耆舊集卷第一百三十三

新化鄧顯鶴湘臯編輯

湘陰左宗植仲基校訂

趙文恪慎軫

五首

慎軫字遵路號篋樓晚號蓼生武陵人嘉慶丙辰  
進士改庶吉士授編修考取御史第一補山東道  
監察御史轉福建道掌京畿道事巡視北城通州  
漕轉刑科給事中憂歸起補禮科給事中出爲廣  
東惠潮嘉道遷廣西按察使再遷廣東布政使升  
授廣西巡撫擢閩浙總督調雲貴總督 贈太子  
少保 予諡文恪公少孤敦敏好學有異資七歲



太公以屬其舅氏王春埜明經敬禧春埜爲時儒  
望言笑不苟有詩教堂集公從受學終身未嘗易  
師公旣外師春埜入則王夫人朝夕策勵言行必  
端謹故能厚重淵默身都通顯刻苦如寒素性篤  
孝以其父屬已於舅氏也事之如父少奉王夫人  
教有怒貴必跪受王夫人見背後語及則泣然與  
弟慎駿友愛棊篤家政悉委之嘗顏其室曰省誓  
每日言行夜必記之有省誓室續筆讀書日記惜  
日筆記諸書公與吾友歐陽礪東爲同年友往客  
都時從礪東許稍窺公崖際未能竟也公巡撫粵  
西余時館李春湖侍郎桂林寓公與侍郎習因稍

知余蹤跡然五年之久未投一刺也暨公督閩之  
命下臨行語侍郎曰吾行去粵矣不可不識湘臯  
乃枉駕見過傾談久諄屬不必報謁余亦竟未報  
謁公亦不以爲簡也公之門人今官臺灣道桐城  
姚瑩石甫天下才也嘗爲余言公立身行已居官  
大節不愧理學名臣之目韻語非所畱意也有詩  
三卷公子敦詒許示我屢索不得今從其邑子楊  
彝寄到數首爲補刻是卷之首其語綽密和粹蓋  
亦得之舅氏云

歐陽竹園泌溪垂釣圖爲令子鍾廬進士作

資水源出武岡泌溪其支派也在邵陽西逆流注資其

上游則泌龍巖巖之東水行原野閒西折爲山阻流入  
巖罅里許復穿巖而出巖之中奧窈幽邃水清深多篠  
魚竹園翁結廬其側終日把釣供母膳母歿非祭不釣  
釣亦不復在得魚矣其子偁繪圖徵詩慎畛爲賦五古  
一章

溪流水清深巖峙山巖嶮叢篠窈然青盤石豁爾凸疑此  
秋一灣知幾蒼崖折澗潄若空遊潛鱗時澈澈廣閒樂可  
知嘉魚稱丙穴幽人把綸竿膳謀白華潔晴裊碧谿煙雨  
濺幽磻雪峇約藻紋浮潄泓鏡波澈結茅隱一廬兀坐苔  
磯缺會心語潦梁上博慈親悅往事溯王祥臥冰殊足埒  
羊棗重嗜好杯捲興感咽小物關至性庸行成奇節令子

富文瀾碧澥長鯨掣寫圖寄餘哀不置孝思結意釣卽空  
釣芳流豈歇絕雲壑互蟠迴松潭引清冽作詩紀令軌緬  
懷山水傑

題孫平叔中丞婆娑洋集

亦嵌旣津東瀛東金甌圖版恢鴻濛橫海使者令肅風  
詔整六師修我戎梁溪中丞今變龍用作霖雨舟楫功飛  
符秉節開朦朧鍼經直指鯢鹿蹤筆籌寰海鏡照空元精  
炯炯星羅胸高張牙纛尊威容譚笑可卻千熊熊荷蘭舊  
傲南北通久披障翳疏覲髮來往程甫三月中峭帆瞥爾  
輕於鴻綱維經緯勞恩恩餘事猶復裁詩筒瑰璋俶詭摘  
挾工光燭海日搏桑紅攬勝蒐奇誰爲同毋迺踵繼玉局

翁歸裝一帙攜示儼如聆仙樂耳忽聰周迴曠若照發蒙  
滄溟歷歷收雙瞳嗟我猶扶麻中蓬閩疆附驥疲駑從何  
術調御蜃幻虹官箴民俗省厥躬讀君新詩鏗洪鐘匪等  
小技矜雕蟲藹如仁言德符充海熟番荒生計崇睢盱誰  
憐窮髮窮花鬢麻達罔不恂同心善始而一終他山還借  
土以攻此行此詩嘉惠隆武庫豈僅軍威雄應須刻石垂  
蒼穹穆如作誦山甫庸

題慶蕉園中丞泛月理琴圖

空江撥柔觴良夜浣塵襟月證前身影琴調太古音閒情  
隨水遠涼意入秋深絃外空諸相微雲淡不侵  
一葉隨明月絃清月亦清露華搖簾影秋氣清茶聲煙水

淡無際雲山低與迎東來有孤鶴掠羽戛然鳴

相署衙 恩日榕城弭節辰薰風聲叶夏時雨澤如春魄  
濯冰壺朗心傾玉塵新迨隨剛匝月珍重問前津

李編修象鵠 五十三首

象鵠字侖圃長沙人嘉慶己未進士改庶吉士授  
編修有味閒齋遺草編修爲雙圃方伯象鵬之兄  
負才早卒雙圃哀之爲梓其遺詩曾遺余一冊今  
三十餘年矣未知何時失去偶從市肆得一編閱  
之穠麗工穩善言風懷出入溫李小杜之閒而不  
襲其貌則以格調瞻舉之故歎前此知之未盡也  
八月十五日夜與宋三芷灣黃四季侯陳大梅修白

三小山桂大香東趙大穀士在庶常館釀飲以一年  
明月今宵多爲韻余拈得月字

斜陽紅映宮鴉飛餘霞散作黃金色須臾月出十丈高晃  
漾東華瓊玉闕人生聚散天風沙況得友朋楚吳粵華筵  
如掌平不頗對此飛騰脫銜櫟酒龍詩虎互相招重約三  
章嚴斧鉞諸君老氣橫九秋健若晴空霜後鵲是時明月  
正當中秋蛩無聲四壁歇隔鄰長笛吹不斷搔首青天露  
溼髮涼風颯颯吹衣裾詩思縱橫渴腸喝我本逃酒如逃  
債今朝頓換謫仙骨事殊興極立蒼茫回首五年空兀兀  
明月在天杯在手書幌獨對圓還缺感君今憐阮籍狂相  
約科頭腳不襪先判僕射如泥醉那得復辭金谷罰忽憶

南鴻北雁翔

自注時余與宋黃三人已乞假矣

江湖迢遞成契濶但願

年佳會仍團圓月如今宵人如月

### 到家

牛旄塵尾拂輕塵歲歲看歸歸始真喜極翻流鐙下淚定

時還我夢中身呼來兒女如生客問到封胡可笑人

自注初見

六弟以爲客也後方知其悞不覺大笑

屋角梅花開爛漫倚闌先折一枝春

### 蕪湖

落日風帆一片斜識舟亭外水清華千秋大筆歸文選六  
代青山屬謝家牛渚月明聞過客蠓磯祠冷噪昏鴉南朝  
名勝餘終古坐對西風酒興賒

出遊連交不至因懷許滄浪故友

自注許隨官金陵



烏衣王謝舊風流可但湖名喚莫愁  
白下有人依畫舫青山無伴失遨頭  
閒聽渡口迎桃葉坐對西風上酒樓  
極目水雲天外遠澹煙城郭秣陵秋

望雞鳴山

自注前明建測象臺及功臣廟於此

象臺遺蹟入雲高臺畔英姿寫鄂褒  
無復黃河申帶礪祇餘銀箭沒蓬蒿  
蔣陵日落空秋色元武湖寒走暮濤  
惟有春風舊槐市青衿弟子尙風騷

自注今府學卽明國子監

守風龍江關

龍江地瀾水冥冥鎮日沿緣伴  
蓼汀早識秋風聞北渚應判濁酒醉東亭  
無情官柳橋邊綠有意巖山眼外青  
孤負揚州好明月吹簫今夜待誰聽

過黃天蕩

孤舟軒簸亂流中日影波痕落照紅誰更使船如使馬不  
堪愁水復愁風潮來白雪浮天地岸指青山入混濛搔首  
蘄王酣戰處江聲合杳泣英雄

尺五樓

木蘭亭畔紫煙霞想像當年駐翠華百尺龍孫人種竹三  
春羯鼓夜催花高樓縹渺神仙宅繡戶葳蕤帝子家最是  
妝臺餘咫尺八牕冉冉鬪紅紗

登舟回望觀音山

暝色僧歸起暮鐘琉璃瓦甃影重重到門綠水通三面入  
寺青山指一峯夕照不會迷遠近層雲猶自盪心胸回頭

卷一百三十三  
展齒東西路樓閣高寒伴嶺松

平山堂題壁

蜀岡迤邐暮雲閒  
水木清華絕兩閒  
無復荷花圍翠襲

餘叢桂滿秋山  
龍蛇壁上神飛動

白注壁上龍蛇飛動大蘇詞也今堂額猶傳爲

文忠公書

魚鳥樽前樂往還  
銀燭官書特惟悴  
風流太守照塵

寰

文遊臺

自注孫莘老李伯時蘇東坡秦少游同遊處因各孫秦皆高郵人

孫李才華信絕倫  
蘇門弟子數髯秦  
不緣淮海餘遷謫

得東南盡主賓  
浩浩江河流萬古  
蕭蕭臺榭照千春

山下神仙路曾聽  
高歌動鬼神

六安溝晚眺

三十六湖斷復連內隄煙是外隄煙西風茆屋千家火  
水蘆花一客船臘後官梅如昔日樓前明月憶當年江  
淮勝概樓名饒遊興贊社珠光夜影圓

順河早發

蝦蟆更急喚傳餐如雪霜華冷壓鞍無力宿醒風易散有  
情歸夢夜常殘荒村茆屋雞聲遠古渡蘆花雁影寒長路  
關心何日盡二千里外是長安

無題

珊瑚環佩望來遲狼籍行箱就理時花下定當邀玉笛簾  
前錯認犯齋期自憐福命如蟬翼不解情緣似繭絲今夜  
羅浮仙夢遠參橫月影照梅枝

雨後病起

絲絲晞髮向朝陽小坐檐牙快早涼久病弱如雛破殼閒  
情冷似鶴披霜隨風落葉封雙屐帶溼殘書理一牀贏得  
牛旄輕拂子長談刻漏過三商

圓明園與李大星白侍直夜宿朝房

環山帶水境清幽金爵棱觚聳上頭樹古直因連上苑月  
明知是近中秋五更畫角催天曙萬點寒星入漢流寄與  
題詩白太傅盧郎直下有同遊

攬鏡

緇衣化盡見京塵攬鏡無端憾轉新醉後形容空復爾鬢  
前霜雪不由人況將遲暮供多疾未敢升沈判此身歲月

如蛇驚赴壑來朝頂上一陽巾

夜泊程磯望

十幅蒲帆下晚風長江淼淼浪連空將醒酒味孤篷裏乍  
別心情細雨中客夢蘆花秋水白人家楓岸夕陽紅當時  
此地維歸艇認取青帘載酒筒

過彭澤望小孤山

打鼓發船彭澤縣石城突兀瞰龍宮長隄猶種先生柳遠  
樹應來少女風釣艇一灣橫淺渚神鴉無數破寒空山僧  
有約爭迎我笑語中流是遠公

皖城懷古

名勝江東久寂寥皖公遺蹟記前朝鹿皮豹隱思何點王

帳金樽顧小喬名士青山魂魄冷美人黃土麝蘭銷扁舟  
一夜閒生感清水塘邊起暮潮

圍火

金爐獸炭火熒熒一片春紅蹴地生睡短關心移藥銚宵  
深無語聽瓶笙閒煨斗酒留詩客罷埽煙奩待雪晴把箸  
細吟吟未穩寒灰撥盡已三更

望遠

深閨寒薄褪紅綃斜倚欄干別憾遙無語落花春寂寂有  
情芳草路迢迢酒樓人繫青驄馬畫角風吹碧玉簫一對  
鶯曉楊柳樹離魂終在灞陵橋

一身

一身人海百難謀洗馬茫茫未解愁大地本無臺避債夢  
猶常似將防秋莊生蛺蝶成仙國小式牛羊比徹侯貧病  
算來猶自得春風且醉賣春樓

移居潘家河沿

自別平泉舊畫堂初來松菊徑全荒春泥傳壁香黏手古  
樹穿鄰綠過牆但與龜謀三兆合甯嫌鳩拙一時忙垂簾  
暫得清閒味隨意拈書伴隱囊

夜起

愁緒鯨鯨未穩眠起看纖月尙娟娟不鳴戍鼓沈沈夜欲  
落銀河耿耿天千里江山迴遠夢一宵燈火勝長年秋聲  
嬾喚垂頭僕茗椀圍爐手自煎



題龔瀛橋遊吳雜紀

天門閭闔接黃池楚客風流唱竹枝句裏青山驚白也吳

中舊事屬明之

自注元龔明之著有中吳舊聞

秋風麋鹿長洲苑上已鶯

花短簿祠想像登臨饒逸興家家團扇寫新詩

筆上生花信手栽吳江楓落妙詩材春秋草木嵇含在姓

字魚蟲夾漈來

自注雜紀中花未魚鳥特詳

角里園荒雙屐折醉眠亭

古一樽開休言結社風流盡勝地松陵日幾回

自遣

自注時病臥初起

黃金虛擲媿雕蟲生計蕭疏北阮窮詞賦功名淹日月龔

鹽事業老英雄沈痾有信來秋後短髮無端入鏡中近欲

掃除參道力註書新號小空同

自注用紫陽註參同契事

爛漫朝彩染俗塵頭銜新署葛天民偶翻本草能傷目細  
讀楞嚴易損神蝴蝶自爭三月夢魚龍戲衍百年身赤松  
也識非吾事但擬逍遙學古人

題龔瀛橋梅花清夢小照

參橫月影舊梅村好夢新移庾嶺春翠羽寒花天外路烏  
欄紗袖意中人三生杜牧繁華地一笑維摩自在身相國  
心腸香國裏爲君散澹寫精神

偶成

文園病渴苦相尋狗監傳宣獻上林飛絮一生成薄命落  
花三月負春心青氍毹手慚潘岳金馬詞人愧子深自注王子  
淵唐人以高祖廟諱改爲深幸是二毛侵未得重須作頌玉堂陰

三月廿二日邀張小蒼舍人閒遊城南登陶然亭因作

雨霽微風趁早涼  
杖藜扶手過山莊  
新萍葉脆知魚樂  
野草香多爲蝶忙  
壇樹曉含煙漠漠  
渌波晴漲水茫茫  
尋春已被春拋我  
落盡藤花滿道芳

春風澹沱滿春城  
載酒城隅緩緩行  
青草雨肥驕塞馬  
綠楊枝健穩啼鶯  
同遊天上張公子  
沈醉人間阮步兵  
拾得殘紅成綰挂  
歸來手自繫門衡

大通鎮守風

射陽湖水碧迢迢  
不分鳩茲望亦遙  
想像浮邱自注山名在蕪湖  
好山色橫風吹水過三朝

泊紫沙洲

條籊風滯木蘭船回首銅陵樹隱然今日郵籤剛七十天  
門山名眞似上青天

過水西門

深秋水遠濬無垠蘆花飛遍一村村  
頭已報水西門

鷺峯寺

粥魚茶板定心禪古寺蕭然水石邊  
花飛舞到門前

欲登金山寺爲舟子所阻因賦

苦憶中泠第一泉瓶笙細細茗濃煎而今落日輕風裏愁

絕淮南上水船

夕照中流映水牕  
留雲亭子影成雙  
舟人更比東風虐  
不放遊人過大江

舟行卽景

四面平流繞翠微  
寒冰風散綠波肥  
夕陽一片空江影  
無數鷓鴣帖水飛

雙拳雪立見寒鷗  
向晚湖冰碎打舟  
廿四橋邊舊明月  
黃昏先挂水西樓

過高郵州

神居山色藐姑肌  
柔櫓聲聲上水遲  
瘦盡垂楊明驛路  
旗風捲露筋祠

阻風界首開窗見月因成

重椿牢繫米家船風滿空灘月滿川三十六湖連甓社江  
妃夜夜弄珠圓

劉伶臺

酣戰江南鬪酒兵高臺百尺記空名青山何處埋狂骨枉  
向車前荷鍤行

通衢門外卽景

誅茆人字作垣牆野水蘆花折滿塘白草黏天迷去路扁  
舟搖曳出南昌

海澱卽景

垂楊近水綠初齊披褐黃鶯自在啼驢背不須攜美酒青

帘斜挂石橋西

登報恩寺塏

第一仁王塏崔嵬鎮大雄石城天闕外海市蜃樓中境到  
非非想門開面面風十層真突兀尺五跨蒼穹白馬青牛  
寺仙人帝子宮高名唐雁塔比屋漢新豐匠似胡寬巧圖  
成忉利工丹鉛迷白地瓦甃補青銅有客同高適登樓憶  
謝公同梯聲橐橐磴道步空空一粟臨滄海長橋渺玉虹  
靈岩通指顧石屋遠冥濛憶昨離湘水飄然下漢東小孤  
停晚翠大別挂朝紅膽笑昌黎怯途嗤阮籍窮當時饒感  
慨此地極磨礱不料飛灰劫難尋救月弓纖阿鞭覲覲電  
母走隆隆

自注今春塔自入層  
以下一角爲雷所震

鳳唳驚飄瓦龍門待斷桐

采思新補綴蛛網舊玲瓏雲靜聞雞犬天高數雁鴻雨花  
臺竦立聚寶水沖瀾定北珠穿曲真成鳥出籠勞筋原不  
惜覽勝苦怱怱

### 虹橋

秋水邗溝溢城隅放小船一渠冰薄薄九曲潤涓涓雁齒  
虹橋外瓊樓玉宇前客來呼鑄鑰日出上花甌砌累元章  
石苔鋪學士錢霜階肥綠髓渚岸折紅蓮紗幔層層隔晶  
屏正正懸鸞方當鏡立蟻又抱珠旋雪巘高低接雲巖左  
右穿開山成綠野鑿壁漏青天檐直猶妨帽樓高直望仙  
梅窗三面濶食脯一門圓北轉廊方窄西迴雷忽偏乍驚  
慈竹長並訝水雲鮮島遠亭如笠隄長路似弦胡寬工匠



巧摩結畫圖傳藻績闕終古風流憶昔賢蘇髯饒感慨白  
傳盛絲絃官舍清明火人家上巳煙浮橋春水漫畫舫柳  
條牽惆悵黃花酒低徊紫陌鞭平山仍故蹟修禊羨當年  
瓊樹無雙品茶牙第五泉登臨還我輩重唱遠遊篇

方轉運應綸 十六首

應綸字紵書號雪浦巴陵人嘉慶己未進士授工  
部主事轉員外郎管理街道廳補授江南道監察  
御史出爲廣東鹽運使憂歸起補浙江鹽運使著  
有憩園詩稿雪浦爲廣西巡撫顯之孫寧紹台道  
桂之子雁平道友清之弟性篤摯生長富貴蕭然  
如寒素官街道時值教匪林清之變特旨派往

搜緝餘匪安撫良善事皆辦兩任都轉脂膏不潤  
以耿介獲咎歸處之夷然詩不事瑯繪饒有風韻  
岳陽樓燕集遇雨晚忽開霽即景成句

風號雨來急湖光蕩雲端遙運雲夢渚一氣喧驚滿舳舻  
泊津口欹側勢未安巨浪掀其尾飄如秋葉乾中流無何  
響舟子屏息看白鼉帶浪走飢蛟怒相搏雨腳大如拳  
天共瀾漫但見雪花湧雜沓奔層巒此時倚樓坐軒波撼  
危欄濁醪不成醉心恍眉頻頻舉杯酌湘君爲我迴狂瀾  
須臾雨聲細颺輪飛晚煙駘宕翳波際驅雲歸巘阮君山  
一綫碧隱隱湖心蟠蒼然暮色至呼燭追前歡鐵笛梅花  
引瑤琴一再彈且盡十斛酒女知鐘漏殘酒闌望湖水湧

出水晶盤

烈婦行爲龍氏女作

湘水浩無涯清波連枉渚皓質稟其精卓哉龍氏女家住  
岳城隈足不出庭戶十三學裁衣十五工織組浮豔薄時  
容貞心常獨許十六賦于歸荆釵親曰杵良人身姓李少  
小丁窮苦學書旣不成執戟事營伍終歲去從軍有弟偕  
母處新婦守空閨紉箴市修脯仰事幸有餘辛勤烏足語  
吁嗟生不辰鵬鳥臨堂廡期近弗言歸蝶化委塵土號呼  
失所天慘怛摧肺腑屢欲以身殉念姑旋自阻自從入門  
來阿母嘉我勤兩載執婦禮旨甘勉具陳朝餐薦紅薑夕  
食行素鱗一旦復弃捐阿姑誰依因尸瘞涼不免余懷何

能馴導思有小郎總角幾成人殷勤向姑言爲郎早完姻  
作羹幸有託誰復惜此身春徂夏亦闌颯颯秋風寒慙也  
侍姑側翻令姑心酸黽勉佐笑語阿姑無歡顏速死本余  
志徒以阿姑存妾存增姑悲奉養何足論山泉入廢井涸  
莫無纖瀾妾心亦何求但求心所安仰視牛女星清光何  
皎皎一年一相見終古得偕老暫缺復團圓兩情長自保  
祇願生別離甯辭歡會少嗟哉余美亡形容長此杳重泉  
無路尋秋風吹蔓草言著嫁時衣髻髻整頓好肅拜阿姑  
前祝姑長壽考今夕爲七夕家家爭乞巧瓜果季婦陳中  
庭季子婦奉姑出堂階舉觴舒天紹十斛勸未休三星已  
向隅罷酒候姑寢悵然返所居閉門壓鍼綫密密縫襟裾

端坐靜百慮慷慨捐其軀是夜悲風起湘竹爲摧枯精氣  
不可泯揚芳滿征途至今封上樹往往連根株

題海豐縣文信國公遺像

甲子門東鳴萬弩黑風簸舟海濤怒東南半壁堂構傾整  
旅勤王尙開府可憐衆志如堅城大勢已去終何補空阮  
轉戰事辛酸策馬麗江檄貔虎五坡嶺興行朝隣瞋目思  
擎九天柱白雁追飛鐵騎橫脫粟在孟身先虜海陬炎祚  
一綫存慟哭匡山折檣櫓閒關絕粒羈大都灑涕揮豪歌  
思苦爲謀宗社歷崎嶇早辦一死酬故主柴市授命何從  
容衣帶銘詩素所樹朔風栗烈面如生陰霾慘澹髮猶豎  
遺像流傳五百年一片丹雘照眉宇賢侯重爲勒貞珉鐵

石肝腸紛撐拄孤忠長抱填海心眞宰應化圖南羽聞昔  
菴苻肆披猖神光煜燭盈庭廡頓令羅拜爭創戈海氛永  
靖民安堵赫哉聲靈鎮火維俎豆血食崇茲土興亡已事  
難具陳落日寒潮自終古

由岳陽至漢口

短艇趁流澌飛行一日期卻看帆影疾翻訝浪紋遲岸濶  
神雅舞風高旅雁馳迷離漢陽樹簫管隱聞吹

經漂母墓

一飯堪千古酬金豈計恩似能憐國士不獨念王孫溪水  
乍聞響野禽空復喧淮陰高敞地寂寞亦荒原

過龍

兩岸盡猿聲滿帆一葉輕風疑吹水立船欲挾山行客暫  
先秋老林煙向晚橫懸湍五百里幾日到羊城

畏吾村謁李文正公祠

耆耆摧將盡貂璫燭未休委蛇銷熾燄持重護清流詩格  
開何李忠謀補謝劉靈祠香一瓣惆悵暮雲秋

題清泉上人南磻課經圖

卓錫無人境經年不出山養成猿鳥性參透佛仙關梵唄  
供清課心齋駐舊顏塵緣吾未了蠟屐偶躋攀

由京旋里途中口占一律

恨望燕臺遠高秋攬轡行歸程隨雁影旅夢逐雞聲水落  
長橋臥山空老樹橫涼風吹瑟瑟增我別離情

春柳

東風齊著力一一嫩條寒小塢眠纔起新鶯坐未安吟鞭  
揮遠陌征棹鼓前灘煙雨溟濛外離情欲繫難

讀上畱田行有感爲某氏子諷

髻齡嬉戲忒情親翩反無端參與辰桑柘競營三畝宅髮  
膚原是一人身庭柯已槁難同被突火纔分似比鄰常棣  
詩章君讀否忍將小忿薄天倫

湖上訪林處士故居

獨樹橋邊隱士居垂楊一帶影清疏徜徉梅鶴成家屬指  
點湖山結草廬但把新詩酬賀監肯畱遺稿傲相如逋仙  
風韻今安在雲水空濛想像餘



春遊

策杖尋春路轉賒青山缺處見人家  
茆亭盡日柔風暖開徧紅欄木筆花

尹教授澍一首

澍字時霖一字雨麓自號半潛散人  
湘潭人嘉慶己未進士授衡州府教授  
有繼求山房詩集教授性端慤幼有神  
童之目嘉慶改元詔舉孝廉方正  
湘人以其名應不就集未見僅從方志  
得其近體一首

石浦草堂懷古步秦禮堂邑侯韻

滿腔忠憤動乾坤  
躩屈能伸那足論  
天爲浣花畱勝蹟  
地

從鑿石闢荒村濶收雲夢胸全盪俯視曹劉氣已吞蘭若  
松林題舊句秋風蕭瑟弔空門

哀侍讀名曜

九首

名曜字道南一字峴岡寧鄉人嘉慶辛酉進士改  
庶吉士授編修歷官翰林院侍讀充日講起居  
注官以目疾乞假家居久之卒著有吾廬草存侍  
讀晚歲與余重遇於桂林臨別索贈言余諾之未  
及爲尋以詩寄余缺然久不報迄余官瀉西方圖  
一償宿負而侍讀遽歸道山矣輯其詩爲之撫然

壬午秋過洞庭

振古此重湖浮生寄太虛乾坤容我贅老病信舟孤水落

山皆峻霜輕輦早枯昏鴉棲未定堪笑是饑驅

### 德州夜雨

夜闌燒燭短霧淅暗河天帶雨數聲雁鳴箏何處船歲時  
驚久客哀樂感中年賸欲聞雞舞瀟瀟澈枕邊

### 南旺登龍王廟

自注泰山在東北距百餘里黃河在南時河決諸郡被水

不耐船窗寂臨梯此壯觀乾坤忽軒豁帶礪想艱難野水  
連天白遙峯障日寒龍興軍駐處迷望一盤桓

自注明末我朝

兵圍京城遂至山東諸郡仍復回遼

### 渡清河

萬里舟行客中流意壯哉泗淮諸水合豐沛大風來濁浪  
天吳舞靈槎斗漢迴上中空獻策長憶賈生才

自注時河決故云

江都署對鶴

仙署雙馴鶴  
翩躚竹裏遊  
夢清棠院月  
聲裊玉楸  
秋綵鳳儀同  
貴驚鴻格豈  
儔  
襍襍慙舞鏡  
何處覓浮邱

過采石磯

亂山崩峭岸  
危石激奔洪  
渚葦晴飛雪  
江狔午拜風  
戰場誰敗北  
逝水日流東  
莫聽平陳樂  
秦王霸業空

皖城再別龔瀛橋同年

秋分纔判袂  
冬盡忽褰帷  
已是同漂泊  
何堪又別離  
關山隔吳楚  
戎馬渡瀍伊  
淚眼門閭望  
言歸莫再遲

送嚴芝軒入秦省親

當代談經濟  
吾鄉許若翁  
嗟予懷舊雨  
送子趁晨風  
嶽色

交衡華文光耿蜺虹鯉庭詩禮暇尙憶麓山中

喜鄧湘臯孝廉買山卜居有作

著述多文近等身藏書有室詎愁貧雲生石岫不關雨風  
撓屋茅無點塵未忍陳蕃虛下榻何曾王粲慣依人諸公  
台省如相問權署名山草莽臣

聶嚴州鎬敏

二首

鎬敏字京圃衡山人嘉慶辛酉進士改庶吉士授  
編修擢司經局洗馬改部郎出爲嚴州府知府

過露筋祠

一父足千古露筋心乃明荒祠待誰葺湖水激餘聲曉雨  
菜花溼春波蘋葉生帆前重回首芳潔寄遙情

題陶雲汀觀察漕河禱冰圖卽次過露筋祠原韻

記話荒祠事簷花映雨明  
今看禱冰景湖鏡瀉風聲  
使節誠能格芳魂死亦生  
綸褒繼仁廟普惠軫皇情

羅淮海琦

五首

琦字麓西善化人嘉慶辛酉進士授內閣中書舍人歷官鎮江府知府權知蘇州終淮海道

嶽麓東西亭

繽紛七十峯蜿蜒面北走到此更融結秀削聳林阜其上  
畱古碣赤字山鬼守其下迴文瀾方塘匯十畝羣壑涵飛  
泉溢流總兼受滉漾浮嵐光環之以煙柳先生山水樂靈  
境關心久蒼波屯赤雲虛曠滌塵垢無乃浮瀛嶠招我入

靈藪湖洞苦疇昔衆妙忽羣有何須誇大觀雲夢吞八九  
亭東

嵩高聳太室少室仍奕奕天生不使獨靈區必雙闢朱鳥  
面湘立雲麓爲之脊東岫舒左翅西嶺垂右翮下貯百泉  
水瑩澈數泓碧一笠編黃茅斑離贅文石到此一憑欄虛  
曠異曠昔賞心信已夥何須更蠟屐勝境恣幽探煙霞豈  
云癖扶輿富靈奇至人信珍惜得一未言足佳趣喜兼獲  
眼前具二美心神應共適奇偶理如茲妙諦參大易西亭  
大風登筍笠峯入寺小憩歸途卽事

莫釐峯頂何崔嵬上有雲氣相往來仙人控鶴遊何處山  
靈扁鐺晝不開天風吹上簞雲裏奔巖捲地驚濤起萬松

助勢走且僵寒飈諛諛清人耳山僧瞥見啟禪關瑤草滿  
院雲滿山自言此簍種此寺萬古歷劫留人閒須臾風定  
氣蕭瑟帆檣沙鳥見一一山腰俯視埽煙蘿沙涵含星懸  
皎曰

麓山二咏應山長教

鹽和漫獨擅風流曙景平添曲沼頭朝露未晞青欲滴春  
波漸暖碧初浮不妨吟興偏因曉却信詩情易感秋試向  
林前聊徙倚溶溶新綠儘消愁

柳塘

露冷霜嚴欲臘天風含翠篠浮娟娟數梢鸞尾曾搖雪萬  
个龍孫自放煙疏影蕭蕭矜晚節碧雲漠漠護殘年從誰  
借得文同筆寫向寒山粉本前

竹林



丁岳陽公路一首

公路字禮門寧鄉人嘉慶辛酉進士山西岳陽縣知縣

黃陵廟

叢祠遙俯洞庭波玉珮珠璫清翠蛾千里蒼梧離賦遠  
林斑竹淚痕多春回國初滋荒蘚雨蝕殘碑帶碧蘿江上  
峯市人不見月明何處鼓雲和

歐陽羅城僞一首

僞字鍾廬邵陽人嘉慶壬戌進士廣西羅城縣知縣  
羅城之兒僕以廩貢官醴陵訓導亦好吟以其  
弟似藝垣與余同舉於鄉因以稿質余後爲其家

索去云以殉葬今欲求其一字入斯集而不可得  
羅城詩亦止一首

泌龍庵

延緣僻徑繞山阿上界今番喜再過四序禪花開般若六  
時天樂奏頻伽法雲漠漠籠香砌慧日曈曈上碧柯回首  
迷津都歷盡一龕終擬借彌陀

沈湘齋集卷第一百二十三終